

Արդեն հեղափոխութիւնից առաջ նոր սերունդը հրաժարվել էր շմոշկից և սկսել էր հագնել եվրոպական՝ ուուսական ձևի կոշիկներ:

Նախասովետական Զանգեզուրի չքավոր բնակչութիւնը չէր կարող ունենալ նույն տեսակի զարդեր և թանկարժեք կտորներից շորեր, ինչպես հարուստները: Բայց քանի որ զարդարանքի ամեն մի տեսակն ուներ իր կոնկրետ մագիկ նպատակադրումը, չէր կարելի, որ և չքավոր կիներ կամ աղջիկը չունենար գոնե նրանցից գլխավոր տեսակները: Բայց նա գործածում էր զարդարանքը կեղծ մետաղից և ակներից: Զարդարանքը ժառանգվում էր սերունդից սերունդ և նույնիսկ շատ չքավոր ընտանիքներում համարվում էր անհրաժեշտ կնոջ պտղաբերութիւնը և ընտանիքի դովլաքը պահպանելու համար: Տղամարդկանց և կանանց զգեստների ձևերը թե՛ հարուստների և թե՛ չքավորների մոտ նույնն էին ազգային տեղական ոճի տեսակետից, բայց չքավորները նույն ձևի պատրաստում էին հասարակ կտորներից և էժանագին, չէին ունենում մի քանի ձևեր շորեր: Բայց չքավոր կնոջ կլօխ շինելու բոլոր մանրամասնութիւնները պահպանվում էին ավելի հասարակ և էժանագին նյութերից: Իհարկե չքավորները հագնում էին իրենց զգեստները մինչև նրանց ծվեն-ծվեն լինելը:

Սովետական օրով հետզհետե և Զանգեզուրում քաղաքի ձևերի շորերը փոխարինեցին տեղական ազգայիններին: Այնուամենայնիվ չի կարելի շնչել, որ մեծահասակ կանայք առայժմ մեծ դժվարութեամբ են հրաժարվում իրենց կլօխը շինելուց ըստ աղաքի՝ թե սովոր լինելու պատճառով և թերևս նաև այն պատճառով, որ նրանք դեռ լիովին չեն հաղթահարել իրենց այն համոզմունքը, թե կլօխ շինելը ապահովում է տան բարեկեցութիւնը: Ինչ վերաբերում է երկու սեռի երիտասարդներին, ապա նրանք լրիվ անցել են ժամանակակից քաղաքի զգեստների ձևերին, որոնք շատ ավելի հարմար են և առողջապահիկ:

Տղամարդիկ ավելի հեշտութեամբ անցնում են քաղաքի շորերին, նամանավանդ, որ դրանք շատ ավելի հարմար են աշխատանքի համար և մատչելի են, քան ազգային զգեստները: